

Nopa Ompa Amatajcuiloli cati Pablo Quitajcuilhui Timoteo

Pablo quitajpalo Timoteo

¹ Na niPablo, niitayolmelajca Jesucristo nimitztajcuilhuía ni amatajcuiloli. Toteco Dios ica ipaquilis nechtequitali quej niitayolmelajca. Nechtequimacac ma niquinilhui masehualme ten nopa nemilisti cati quitencahuilijtoc quinmacas nochí cati tatzquitoque ipan Cristo Jesús.

² Noicni Timoteo, nimitzicnelía quej tinocone. Toteco Dios huan Toteco Jesucristo ma quipyá hueyi iyolo ica ta. Ma mitztasojta huan ma mitzmaca tasehuilisti ipan moyolo.

Amo xipinahua xiteyolmelahua ten Jesucristo

³ Nochipa nimitzelnamiqui huan nijtascamati Toteco tayohua huan tonaya pampa tijneltocatoc. Yaya cati nijtequipanohua ica noyolo tapajpactic iixpa quej nohuejcapan tatahua nojquiya quichijque.

⁴ Nijnequi sempa nimitzitas pampa niquelnamiqui quenicatza tichocac quema timonahuatijtejque huan nipaquis miyac quema sempa timoitase.

⁵ Nijmati ta tijneltoca Toteco ica nochí moyolo quej achtohui quichijqui mohueyi nana, Loida, huan teipa monana, Eunice.

⁶ Huajca nimitzelnamiquiltía xijtequihui huan xijmaca tetili nopa yajatili cati Toteco mitzmacac quema nijtali nomax ipan motzon teco.

7 Pampa nopa tonaltzi cati Toteco techmacatoc amo techchihua ma timajmahuica. Yaya techmaca chicahualisti. Techchihua ma tiquinicnelica masehualme huan ma tijpiyaca cuali totalnamiquilis.

8 Huajca amo quema xipinahua xiquinyolmelahua masehualme ten Jesucristo huan xiquinilhui na nitzactoc pampa nijneltoca. Huan ica ichicahualis Toteco monequi xiquijyohui nochí cati monequi tiquijyohuis pampa titeilhuía icamanal.

9 Pampa yaya Toteco techmaquixti ten totajtacolhua huan technotzqui para ma tiitztoca titatzejzeloltique iixpa. Amo techmaquixti ten totajtacolhua pampa tijchijtoyaj cati cuali. Toteco techmaquixti san pampa quipixqui hueyi iyolo ica tojuanti huan quinejqui ya nopa quichihuas. Toteco quijito quema ayemo quichihuayaya taltipacti para teipa quipiyasquía hueyi iyolo ica tojuanti por cati Jesucristo techchihuilisquía.

10 Pero ama technextilijtoc nochí cati quisencajqui quichihuas pampa Totemaquixtijca Jesucristo hualajqui huan quitamilti ichicahualis miquilisti para ayecmo teno huelis techchihuilis. Huan yaya technextilijtoc para tiitztose para nochipa ihuaya ya sintia tijneltocase icamanal.

11 Huan Toteco nechtequitalijtoc niitacamanalhuijca huan niitayolmelajca huan niitamachtijca para ma niquinilhui masehualme cati amo israelitame ni cuali camanali.

12 Yeca nitaijyohuía nica ipan tatzacti. Pero amo nipayahua, pampa niquixmati yaya cati nijneltoca huan njmati temachtí para yaya quipiya chicahualisti para quimocuitahuis cati nijcajtoc imaco

hasta ajsis nopa tonali cati ya quitalijtoc.

¹³ Timoteo, quema tiquinilhuía masehualme ni cuali camanali cati nimitzilhuijtoc, amo xipata yon se quentzi. Xitenextili quenicatza tijneltoca Toteco huan tiquinicnelía masehualme pampa titztoc ipan Jesucristo.

¹⁴ Ica itapalehuil Itonal Toteco cati itztoc ipan toyolo, xijmocuitahui nopa cuali camanali cati Toteco quicajtoc momaco, huan amo aqui xijcahuili ma quipata.

¹⁵ Huelis ya tijmati para nechcajtejque nochitaneltocani cati ajsicoj nica ten tali Asia, hasta nojquiya nechcajtejque Figelo huan Hermógenes.

¹⁶ San Onesíforo, amo. Toteco ma quitasoja ica nochiihuicalhua pampa miyac huelta yaya hualajqui para nechyołchicahuas, huan amo pinajqui pampa niitztoya nica niilpitoc ica tepos cadena.

¹⁷ Huan quema Onesíforo itztoya ipan altepet Roma, amo moquetzqui nechtemojtinenqui hasta nechpanti.

¹⁸ Ma Toteco quitasoja ipan nopa tonali quema techtequitachilis. Ta cuali tijmati quenicatza techpalehui nojquiya nepa ipan altepet Éfeso.

2

Se cuali soldado ten Jesucristo

¹ Nocone Timoteo, tijmati para nelía hueyi iyolo Toteco ica ta ipan Cristo Jesús huan mitzmacatoc miyac yajatili.

2 Nopa tamachtili cati tijcajqui nitamachti iniixpa miyac masehualme, ama xiquinmachtí sequinoc cati temachme para teipa inijuanti nojquiya huelise quinmachtise sequinoc.

3 Nojquiya xiquijyohui taijyohuilisti nohuaya quej se cuali soldado ten Jesucristo.

4 Xijchihua quej se tacat cati mosoldadojchihua. Yaya amo hueli moilpis ica tamanti ipan ininemilis sequinoc masehualme. San hueli moyolihuía quenicatza quipactis iteco cati quisoldadojchijqui.

5 Huan xijchihua quej se motalojquet cati motalohua ica sequinoc para quiitase ajquiya tatanis. Monequi motalos senquisa xitahuac quej quijtohua tanahuatili, pampa sintá amo, huajca amo huelis tatanis huan quiselis nopa xochitzonyahuali.

6 Eltoc san se quej se milchijquet. Yaya achtohui monequi tequitis chicahuac para huelis teipa quicuas cati quipixcas.

7 Huajca ximoyolilhui miyac ica cati nimitzhuijtoc nica huan Toteco mitzpalehuis tijmachilis nochí.

8 Xiquelnamiqui Jesucristo quema titaijyohuía. Yaya cati tacatqui quej iteipan ixhui Tanahuatijquet David ten huejcajquiya huan yaya cati sempa moyolcuic quema mictoya. Ya ni nopa cuali camanali cati nitepohuilía,

9 huan yeca niquijyohuía miyac taohuijcayot huan niilpitoc ica tepos cadena quej se nitaixpanoquet cati temajmati. Pero masque na niilpitoc ica tepos cadena, Toteco icamanal amo ilpitoc.

10 Huan niquijyohuía nochí catí huala pampa niquinicnelía inijuanti catí Toteco quintapejpenitoc nojquiya para iaxcahua. Nijnequi inijuanti ma momaquixtca ipan Cristo Jesús para huelis itztose para nochipa nepa campa tatanexti.

11 Ya ni se camanali catí melahuac:
Sinta timijque quema Cristo mijqui,
nojquiya tiitztoseihuaya.

12 Sinta tiquijyohuáj taohujcayot pampa tiquixmatij, se tonali titanahuatise ihuaya.
Sinta tiquijtohuaj amo tijchihuase catí Cristo techilhuía,
huajca yaya quiijtos amo techmacas nopa tatan-cayot.

13 Sinta tojuanti amo tiitztoque titemachme,
yaya itztoc temachti pampa amo hueli quiijtos
para amo moixmati iselti huan yaya itztoc
ipan toyolo.

Xijchihua itequi Cristo ica nochí mochicahualis

14 Xiquinelnamiquilti taneltocani ten ni tamanti. Xiquinilhui iixpa Toteco ma amo tanajnanquilica ten taya quiijtosnequi sesen camanali, pampa amo teno ipati huan san quitamisosolos ininemilis catí quitacaquilise.

15 Xitequiti chicahuac, huan quej nopa, quema ajsis nopa tonal quema timonextis iixpa Toteco, yaya hueli quiijtos para tijchijqui catí quipactía. Xiitzto se cuali tequipanojquet catí amo quipiyas yon se tamanti catí ica mopinahuas. Xiitzto quej se tequipanojquet catí cuali quimati quenicitza quitequihuis huan quiixtomás Icamanal catí melahuac.

16 Xiquintalcahui masehualme cati tamachtíaj cati amo quinamiqui huan cati amo ipati, pampa ica inincamanal quinyacanaj masehualme ma quichihuaca más tamanti cati amo quipactía Toteco.

17 Inintamachtil cati amo melahuac tamahua quej se cocolisti cati tamahua. Quej nopa itamachtil Himeneo huan Fileto.

18 Inijuanti chicoquistoque ten nopa camanali cati melahuac. Ama tamachtíaj para ya moyolcuitoque nochí masehualme cati mictoque cati moyolcuise. Yeca sequij cati taneltocayabaj ayecmo quimatiq taya quineltoCASE.

19 Pero ipan ichaj Toteco quitalijtoc se tatzinpehuaultili cati temachti huan nepa ijcuilijtoc ya ni: “Toteco quinixmati inijuanti cati nelía iaxcahua”; huan nojquiya quijtohua: “Nochi masehualme cati motemachijtoque ipan Tohueyiteco Jesucristo ma ayecmo quichihuaca cati amo cuali.”

20 Ipan se hueyi cali cati iaxca se tacat cati tapijpixtoc onca miyac tamanti cati inijuanti quitequihuíaj. Onca sequij tamanti cati amo patiyo quej huajcali huan soqui chachapali, huan nojquiya onca sequij cati patiyo cati quichijtoque ica oro huan ica plata. Nopa cati iaxca nopa cali quitequihuía huajcali huan tamanti ten soquit ipan se tequit cati quejhueldzi. Huan quitequihuía tamanti cati patiyo quema monequi cati yejyectzi para masehualme quitepanitase.

21 Huajca sinta se taneltocaquet mohuejcatalis ten inijuanti cati tamachtíaj cati amo cuali, yaya elis quej se tamanti cati nelía ipati ipan ichaj

Toteco. Huan Toteco quiyyocatalis para quitequi-huis ipan cati hueli tequit cati cuali. Huan nochimasehualme cati quiitase, quitepanitase Toteco.

²² Huajca xicholojtehua quema mitzyoltilana se tamanti para xijchihua quej telpocame ten nitaltipacti quinpactía quichihuase. Xijtoquili cati xitahuac. Xijneltoca Toteco ica nochimoyolo, xiquinicneli masehualme huan cuali ximohuica ica nopa taneltocani cati motemachíaj ipan Toteco ica iniyolo cuali iixpa.

²³ Xiquintalcahui tacame cati camanaltij huihui camanali pampa teipa san pehuaj mocamaijix-namiquij.

²⁴ Se cati itequipanojca Tohueyiteco ma amo quitemo para mocamaijixnam quis ica sequinoc. Monequi ma quinchihuili nochimasehualme cati cuali. Monequi tamachtis cuali para masehualme ma quimachilica itamachtil huan monequi ma quipiya iyolo ica nochim.

²⁵ Se itequipanojca Tohueyiteco monequi quimachitis ica cuali camanali nopa masehualme cati quicualancaitaj. Huelis Toteco quinpatilis iniyolo para huelis moyolpatase huan quimatise cati melahuac.

²⁶ Huan quej nopa, cholose ten campa quintaquechilijtoc Amocualtacat, pampa yaya quinmasiltijtoc para ma quichihuaca cati yaya quinequi.

3

Ipan itamiya tonali masehualme quichihuase más cati amo cuali

¹ Nojquiya monequi tijmatis ya ni. Quema hualas itamiya tonali elis nelía mahuilili.

² Masehualme san moicnelise iniselti huan tahuel quiixtocase tomi. Tahuel motepanitase huan mohueyimatise. Quitaijilhuise Toteco huan amo quintepanitase ininanahua huan intatahua. Amo motascamatise por cati quiselijtoque huan amo teno quiitase para tatzejzelotic.

³ Amo teicnelise. Amo tetasojtase. San tee-jelnamiquise, ayecmo huelise monahuatise huan yeca quichihuase san cati quinequise. Tetai-jiyhuitise ica paquilsti, huan quicualancaitase noch tamanti cati cuali.

⁴ Quena, ipan tayacapan tonali masehualme quincajcyahuase hasta inihuampoyohua huan tahuel mosisinise huan quichihuase ten hueli tamanti. Moilhuise neltalnamiquij, pero amo neli. Quitemse san nopa tamanti cati ica hueli mopaquilismacase, pero amo quitemse Toteco.

⁵ Sequij ten ni masehualme mochihuase quej elisquía quiixmatij Toteco, pero amo. Ica cati quichihuase quinextise para amo teno quinequij ten ichicahualis.

Xiquintalcahui masehualme cati quej ni quichihuaj.

⁶ Tacame quej injuanti quincajcyahuaj sihuame cati huihuitique para huelis calaquise ipan ininchaj para tamachtise cati amo melahuac. Huan quinmasiltíaj nopa sihuame para ma quitoquilica intamtachtil. Nopa sihuame ya quipiyaj miyac intantacolhua huan tahuel quinequij quichihuase san cati quinpactía.

7 Nopa sihuame nochipa quinequij momachtise nochí tamachtilisti cati yancuic, pero amo quema hueli quimachilíaj cati melahuac.

8 Nopa tamachtiani quinequij quitzacuilise nopa camanali cati melahuac quej Janes huan Jambres, itenahualhuijcahua Faraón huejcajquiya quinequiyayaj quitzacuilise nopa tiochicahualnescayot cati Moisés quichihuayaya. Ya nenpolijtoc inintalnamiquilis nopa tamachtiani. San tacajcayahuaj quema quijtohuaj quineltocaj Toteco, pampa amo cana.

9 Pero ayecmo huejca yase, pampa teipa nochí quinitase para huihuitique quej panoc ica Janes huan Jambres huejcajquiya.

Pablo quiilhui Timoteo más cati monejqui quimatis

10 Pero ta, Timoteo, tijtoquilijtoc cati nita-machtía huan cati na nijchihua. Tijmati cati nijnequi nijchihuas ipan nonemilis huan quenicatza nijneltoca Toteco. Tiquitztoc quenicatza niquijyohujtoc nochí cati nechpanotihualajtoc. Tijmati niteicnelía huan nijpiya noyolo ica sequinoc.

11 Tijmati quenicatza nechtaijyohuilitijque miyac huan quenicatza nimoyoltetili. Tijmati quenicatza nechtamicocojque ipan altepet Antioquía, Iconio huan Listra, pero sese huelta Toteco nechmanahui.

12 Huan nochí taneltocani cati nelía quinequij monejnemiltise quej Cristo Jesús quinequi, quipanose taijyohuilsti ica masehualme.

13 Pero amo cuajcualme huan nopa tacajcayajca tamachtiani noja más quichihuase cati fiero. Quisenhuiquilise tacajcayahuase más pampa Amocualtacat quisenhuiquilis quincajcahuas.

14 Pero ta, Timoteo, xijtoquilijinemi cati timomachtijtoc huan cati tijmati para melahuac pampa tiquinixmati ajquiya inijuanti mitzmachtijtoque.

15 Pampa ta hasta quema ticonetzi ipa tiquix-matiyaya nopa Tajcuiloli cati tatzejzeloltic. Hua-jca amo xijcahua. Huan Icamanal Toteco mitz-talnamictijtoc huan mitznextilijtoc quenicatzá huelqui timomaquixti ten motajtacolhua pampa tijneltocac Cristo Jesús.

16 Toteco temamacac nochí nopa Tatzejzeloltic Tajcuiloli, huan quipyia itequi para techmachtis cati melahuac huan techtacahualtía quema tijchi-huaj cati amo monequi. Huan Icamanal techtal-namictía huan technextilía quenicatzá timonejne-miltise xitahuac.

17 Quena, Toteco techmacatoc Icamanal para techcualtalis nochí tojuanti cati tiiaxcahua para huelis tijchihuase nochí cati cuali.

4

Xitepohuili Icamanal Toteco

1 Timoteo, nimitznahuatía iixpa Toteco Totata huan iixpa Toteco Jesucristo cati se tonali quintajtolsencahuas nochí masehualme cati yoltoque huan cati mictoque quema sempa hualas ipan taltipacti para tanahuatis,

2 xitepohuili icamanal Toteco. Xiquinilhui masehualme icamanal nochipa masque ohui

tijchihuas o amo ohui. Xiquinxitahua cati amo quimatij taya monequi quichihuase huan xiquintacahualti cati ica ininpaquilis tajtacolchihuaj. Xiquinyolchicahua ma quichihuaca cati cuali huan nochipa xiquinmachtí ica camanali cati cuali.

³ Pampa ajsis se tonali quema masehualme ayecmo quinequise quitacaquilise nopa tamachtili cati xitahuac. Quinequise quitacaquilise san cati inijuanti quinpactía. Huan quintemose tamachtiani cati quinmachtise cati inijuanti quinequij.

⁴ Huan ayecmo quitacaquilise cati melahuac, san quitoquilise camanali cati quiyoliltijtoque masehualme.

⁵ Pero ta, Timoteo, nochipa xijpiya cuali motalnamiquilis. Ximoyoltetili quema titaijyohuía. Xiquinlhui masehualme icamanal Toteco huan xiquinnotza ma quitoquilica. Xijtamichihua mojmosta nochí nopa tequit cati Toteco mitzmacatoc.

⁶ Pero ica na, ya nijtoyajtoc nonemilis para Toteco quej se tacajcahualisti cati atic, huan ya monechcahuijtihuala nopa tonali quema nimiquis.

⁷ Na nitatehuijtoc chicahuac quej se cuali soldado monequi quichihuas. Na ya nijtamiltijtoc nochí notequi quej se matalojquet cati matalojtoc hasta campa ontami. Huan nimochijtoc temachti ipan nopa tamachtili cati Toteco nechnextili ma nijneltoca.

⁸ Huajca ama nechchiya ica se corona cati nijtantoc pampa nijchijqui cati xitahuac. Huan Tohueyiteco, nopa tequitquet cati xitahuac,

nechmacas nopa corona quema techtequitachilis nochititaneltocani. Huan amo san na nijselis se corona, nojquiya quiselise nochititaneltocani cati tahuel quichixtoque ma huala.

Xihuala techpaxaloqui

⁹ Xijchihua campeca para nimantzi tihuallas techpaxaloqui,

¹⁰ pampa Demas ya nechtahuelcajqui. Yaya yajqui altepet Tesalónica pampa tahuel quiicnelía tamanti ten ni taltipacti. Crescente yajqui tali Galacia para quichihuas itequi Toteco, huan Tito yajqui tali Dalmacia.

¹¹ San toicni Lucas itztoc nohuaya. Xijtemo Marcos huan xijhualica pampa yaya nechpalehuis miyac ipan ni tequit.

¹² Nojquiya amo aqui Tíquico pampa nijtitanqui altepet Éfeso.

¹³ Quema tihuallas, techhualiquili notaque cati nijcajtejqui ipan ichaj Carpo ipan altepet Troas. Nojquiya techhualiquili nopa amatapohuali, pero achi más nijnequi techhualiquili nopa amat cati ipan nitajcuilohuayaya.

¹⁴ Alejandro nopa teposchijquet nechchihuilitoc miyac tamanti cati amo cuali. Toteco ma quicuepili quej quinamiqui ica cati quichijtoc.

¹⁵ Ximomocuitahui ica ya pampa nelía quinequi quitamiltis cati titamachtíaj.

¹⁶ Quema achtohui monejqui nimonextis iniixpa nopa tequichihuani, amo aqui hualajqui para nechtempalehuis. Nochi nechtahuelcajque. Ma amo quintatzaculti Toteco por cati quichijque.

¹⁷ Pero Toteco, quena, yaya itztoya nohuaya huan nechmacac chicahualisti para cuali ma nitepohuili icamanal huan quicajque miyac masehualme cati amo israelitame. Huan Toteco nechmanahui quema tacame quinequiyayaj nechmictise.

¹⁸ Huan nijmati Toteco nechmaquixtis ten nochí cati amo cuali huan nechhuicas nepa ilhuicac campa yaya tanahuatía. Ma tijhueyichihuaca para nochipa. Quej nopa ma eli.

Pablo tanqui tajcuilohua

¹⁹ Xiquintajpalo Prisca huan Aquila. Huan xiquintajpalo nochí cati itztoque ipan ichaj Onesíforo.

²⁰ Mocajqui Erasto ipan altepet Corinto. Nojquiya nijcajtejqui Trófimo ipan altepet Mileto pampa mococohua.

²¹ Ximoisihuilti para huelis tiajsiqui nica quema ayemo taseseya. Mitzontajpalohuaj Eubulo, Pudente, Lino, Claudia huan nochí toicnihua ipan Cristo nica.

²² Tohueyiteco Jesucristo ma itzto ica motonal, Timoteo. Huan ma quipiya hueyi iyolo ica nochí amojuanti nopona. Quej nopa ma eli.

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

c565d9f9-d202-544b-b78a-3c93df26508e